



Na osnovu člana 22 Statuta Brčko distrikta BiH – prečišćeni tekst (Službeni glasnik Brčko distrikta BiH, broj 2/10), Skupština Brčko distrikta BiH na 11. vanrednoj sjednici održanoj 21. decembra 2022. godine, usvaja

Z A K O N
O IZVRŠENJU BUDŽETA BRČKO DISTRIKTA BOSNE I HERCEGOVINE ZA 2023.
GODINU

DIO PRVI – OSNOVNE ODREDBE

Član 1
(Predmet)

Zakonom o izvršenju budžeta Brčko distrikta Bosne i Hercegovine za 2023. godinu (u daljnjem tekstu: Zakon) propisuju se opća pravila i postupak izvršenja budžeta Brčko distrikta Bosne i Hercegovine za 2023. godinu (u daljnjem tekstu: budžet), nadzor nad izvršenjem budžeta i druga pitanja vezana za izvršenje budžeta.

Član 2
(Obaveza donošenja zakona)

Obaveza donošenja Zakona propisana je članom 79 stavom 1 Zakona o budžetu Brčko distrikta Bosne i Hercegovine (u daljnjem tekstu: Zakon o budžetu), koji se usvaja zajedno s budžetom za fiskalnu godinu.

DIO DRUGI – IZVRŠENJE BUDŽETA ZA 2023. GODINU
POGLAVLJE I. OPĆA PRAVILA I POSTUPAK IZVRŠENJA BUDŽETA

Član 3
(Budžetska ravnoteža)

- (1) Ukupna budžetska potrošnja je obavezno uravnotežena s ukupnim budžetskim sredstvima.
- (2) Svi rashodi i izdaci se utvrđuju u budžetu i uravnoteženi su s prihodima i primicima.

Član 4

(Vremensko trajanje)

Budžet se odnosi i važi za fiskalnu 2023. godinu (u daljnjem tekstu: fiskalna godina).

Član 5

(Namjena korištenja sredstava)

- (1) Budžetski korisnik sredstva koristi samo za namjene koje su utvrđene budžetom do iznosa odobrenog za tog budžetskog korisnika.
- (2) Namjenski prihodi i primici koji nisu planirani u budžetu, a ostvare se tokom fiskalne godine, odlukom o izmjeni budžeta uvrstavaju se u budžet zajedno s rashodima i izdacima koji se finansiraju iz navedenih namjenskih prihoda i primitaka.

Član 6

(Izvršenje budžeta)

Budžet se izvršava na osnovu Zakona i operativnih planova za izvršenje budžeta, u skladu s članom 83 i članom 84 Zakona o budžetu.

Član 7

(Uplata javnih prihoda)

Svi javni prihodi koji pripadaju budžetu uplaćuju se na odgovarajuće depozitne račune za prikupljanje javnih prihoda u poslovnim bankama, a koji se nalaze u okviru Jedinstvenog računa Trezora (u daljnjem tekstu: JRT) i Centralnoj banci Bosne i Hercegovine, u skladu sa Zakonom o Trezoru Brčko distrikta Bosne i Hercegovine (u daljnjem tekstu: Zakon o Trezoru) i Odlukom o uplatnim računima prihoda budžeta i fondova Brčko distrikta Bosne i Hercegovine, načinu uplaćivanja tih prihoda i načinu i rokovima izvještavanja korisnika prihoda.

Član 8

(Evidentiranje javnih prihoda)

Svi javni prihodi koji pripadaju budžetu i koji su uplaćeni na odgovarajuće depozitne račune za prikupljanje javnih prihoda, evidentiraju se u Glavnoj knjizi Trezora (u daljnjem tekstu: Glavna knjiga).

Član 9

(Više ili pogrešno uplaćeni prihodi)

Više ili pogrešno uplaćeni javni prihodi u budžet vraćaju se uplatiocima na teret JRT-a ili preknjižavaju na odgovarajuću vrstu prihoda, a na osnovu rješenja koje donosi Trezor Brčko distrikta Bosne i Hercegovine (u daljnjem tekstu: Trezor) i Direkcija za finansije Brčko distrikta Bosne i Hercegovine, Porezna uprava (u daljnjem tekstu: Porezna uprava).

Član 10

(Obim i struktura zaduživanja)

- (1) Obim zaduživanja za izvršenje rashoda i izdataka u toku fiskalne godine vrši se u skladu s usvojenim budžetom.
- (2) Obim i strukturu zaduženja čini ukupan iznos i vrsta primitaka po osnovu zaduženja iskazanih u budžetu, uključujući i izmjene budžeta.
- (3) Obim i struktura zaduženja iz stavova 1 i 2 ovog člana ne odnose se na zaduženja koja nisu planirana budžetom za fiskalnu godinu.

Član 11

(Struktura i iznos postojećeg duga)

Struktura i iznos postojećeg duga se utvrđuje na kvartalnom i godišnjem nivou i iskazuje u izvještaju o stanju duga, odnosno zaduženja, koji je sastavni dio kvartalnog i godišnjeg izvještaja o izvršenju budžeta.

Član 12

(Ovlaštenja u proceduri zaduženja)

- (1) Vlada Brčko distrikta Bosne i Hercegovine (u daljnjem tekstu: Vlada), na prijedlog nadležnog budžetskog korisnika, odlučuje o pokretanju procedure zaduženja i svrsi zaduženja u skladu sa Zakonom o zaduživanju, dugu i garancijama Bosne i Hercegovine i Zakonom o unutrašnjem dugu Brčko distrikta Bosne i Hercegovine i donosi odluku o inicijativi za pokretanje procedure zaduženja.
- (2) O odluci iz stava 1 ovog člana, gradonačelnik Brčko distrikta Bosne i Hercegovine (u daljnjem tekstu: Gradonačelnik) obavještava Skupštinu.
- (3) Gradonačelnik i direktor Direkcije učestvuju u pregovorima s kreditorom u proceduri zaduženja.
- (4) Nakon utvrđenih uslova zaduženja Direkcija dostavlja Vladi nacrt prijedloga odluke o zaduženju Brčko distrikta Bosne i Hercegovine (u daljnjem tekstu: odluka o zaduženju) na odobravanje.
- (5) Vlada odobrava nacrt prijedloga odluke o zaduženju i prosljeđuje Skupštini Brčko distrikta Bosne i Hercegovine (u daljnjem tekstu: Skupština) na razmatranje i usvajanje.
- (6) Zaduzenje kod međunarodnih finansijskih institucija koje se vrši posredstvom Ministarstva finansija i Trezora Bosne i Hercegovine, a u kojima s ostalim nivoima vlasti Bosne i Hercegovine sudjeluje i Brčko distrikt Bosne i Hercegovine (u daljnjem tekstu: Distrikt) vrši se u skladu sa Zakonom o zaduživanju, dugu i garancijama Bosne i Hercegovine.
- (7) U slučaju iz stava 6 ovog člana odluku o inicijativi za pokretanje procedure zaduženja usvaja Skupština na prijedlog Vlade.
- (8) Odluka o zaduženju u slučaju iz stava 6 ovog člana procesuiru se u skladu sa stavom 4 i stavom 5 ovog člana.
- (9) Odluku o zaduženju usvaja Skupština.

Član 13

(Uslovi, ovlaštenja i način zaključivanja ugovora o zaduženju)

- (1) Uslovi zaduženja se utvrđuju nakon provedenih pregovora i sastavni su dio odluke o zaduženju.
- (2) Gradonačelnik potpisuje kreditne sporazume i ugovore o preuzimanju obaveza po osnovu zaduženja Distrikta nakon usvajanja odluke o zaduženju iz člana 12 ovog zakona.

Član 14

(Način upravljanja javnim dugom)

Upravljanje javnim dugom Distrikta se vrši u skladu s članovima 94 i 95 Zakona o budžetu.

Član 15

(Odgovornost u izvršenju budžeta)

Odgovorno lice budžetskog korisnika i budžetski korisnik dužni su izvršavati budžet u skladu s članom 78 stavovima 2 i 3 Zakona o budžetu.

Član 16

(Prioriteti u izvršenju budžeta)

Budžet se izvršava po sljedećim prioritetima:

- a) obaveze po osnovu unutrašnjeg i vanjskog duga;
- b) obaveze po sudskim presudama;
- c) bruto plate i naknade zaposlenih i naknade poslanicima u Skupštini;
- d) donacije za socijalna davanja u skladu s posebnim zakonom odnosno odlukom Vlade;
- e) donacije za boračko-invalidsku zaštitu u skladu s posebnim zakonom odnosno odlukom Vlade;
- f) donacije i subvencije u poljoprivredi i privredi u skladu s posebnim zakonom odnosno odlukom Vlade;
- g) ostale donacije u skladu s posebnim zakonom odnosno odlukom Vlade;
- h) materijalni troškovi;
- i) kapitalni izdaci;
- j) ostali rashodi i izdaci.

Član 17

(Preraspodjela sredstava na budžetskim stavkama)

- (1) Saglasno odredbama člana 72 Zakona o budžetu, Direkcija, na zahtjev budžetskog korisnika, može donijeti odluku o preraspodjeli sredstava u okviru ukupnog iznosa odobrenog budžeta za budžetskog korisnika, a najviše do 10% (deset posto) ukupnog budžeta budžetskog korisnika, ne uključujući naknadne izmjene budžeta.

- (2) Preraspodjela iz stava 1 ovog člana se ne odnosi na kapitalni budžet, kao i na rashode za bruto plate i doprinose poslodavca i naknade troškova zaposlenika.
- (3) Odgovornost za poštovanje ograničenja iz stava 1 ovog člana snosi budžetski korisnik.

Član 18 **(Ograničenje izvršenja budžeta)**

- (1) Budžetski korisnik ne stvara niti izmiruje obaveze iznad ukupnog iznosa odobrenog budžetom.
- (2) U toku fiskalne godine prilikom izvršenja budžeta kod budžetskog korisnika može doći do odstupanja u iznosu planiranih i izvršenih sredstava na nivou glavne grupe ekonomske klasifikacije.
- (3) U slučaju iz stava 2 ovog člana budžetski korisnik je obavezan da kroz izmjenu budžeta odnosno preraspodjelu sredstava na budžetskim stavkama do kraja fiskalne godine osigura ravnotežu planiranih i izvršenih iznosa sredstava na nivou glavne grupe ekonomske klasifikacije.
- (4) Odstupanja iz stava 2 i stava 3 ovog člana ne odnose se na sredstva kapitalnog budžeta iz prethodnih godina, a čije izvršenje traje u fiskalnoj godini.

Član 19 **(Operativni plan za izvršenje budžeta)**

- (1) Operativni plan za izvršenje budžeta sačinjava se i odobrava nakon usvajanja budžeta.
- (2) Budžetski korisnik je dužan dostaviti Direkciji prijedlog operativnog plana za izvršenje budžeta (u daljnjem tekstu: operativni plan) u skladu s Uputstvom budžetskim korisnicima o načinu sastavljanja i okvirnim iznosima operativnih planova.
- (3) Rashodi i izdaci svakog budžetskog korisnika ne mogu prelaziti iznos budžetskih sredstava odobrenih operativnim planom.

Član 20 **(Obustavljanje izvršenja rashoda i izdataka)**

Ukoliko se na osnovu analize novčanih tokova, odnosno realizacije rashoda i prihoda tokom jednog kvartala ustanovi da postoji opasnost nastanka nelikvidnosti budžeta, Direkcija inicira obustavljanje izvršenja pojedinih rashoda i izdataka kao mjeru za održavanje likvidnosti, u trajanju od najduže 45 dana.

Član 21 **(Glavna i pomoćna blagajna)**

- (1) Trezor osigurava gotovinska sredstva putem glavne blagajne.
- (2) Budžetski korisnik, putem pomoćne blagajne, može vršiti isplatu troškova službenog putovanja i ostalih sitnih materijalnih troškova.

- (3) Budžetski korisnik, putem specijalne blagajne, može raspolagati sredstvima za specijalne namjene ukoliko je to zasnovano na aktima budžetskog korisnika.

Član 22 **(Avansne isplate iz budžeta)**

Budžetski korisnik može izvršiti avansnu isplatu dobavljaču bez obezbjeđenja garancije za isplaćeni avans pod uslovom da iznos avansa ne prelazi 2.000,00 KM.

Član 23 **(Izvršavanje tekućih rashoda)**

Tekući rashodi u fiskalnoj godini izvršavaju se na osnovu budžeta i odobrenih operativnih planova.

Član 24 **(Izvršavanje kapitalnog budžeta)**

- (1) U fiskalnoj godini mogu se realizovati projekti iz kapitalnog budžeta za 2021, 2022. i 2023. godinu, u skladu s članom 25 Zakona o budžetu.
- (2) Kapitalni budžet za fiskalnu godinu izvršava se na osnovu budžeta i odobrenih operativnih planova.

Član 25 **(Postupak korištenja sredstava rezerve)**

- (1) Sredstva rezerve koja su planirana u budžetu koriste se za hitne i nepredviđene namjene i za finansiranje otklanjanja posljedica elementarne nepogode ili druge izvanredne situacije, za koju u budžetu nisu planirana sredstva.
- (2) Sredstva rezerve iz stava 1 ovog člana utvrđuju se budžetom i mogu iznositi najviše do 5% (pet posto) planiranih budžetskih prihoda bez namjenskih prihoda i primitaka.
- (3) Nadležni budžetski korisnik upućuje Vladi nacrt prijedloga odluke o odobravanju korištenja sredstava rezerve uz obrazloženje i pribavljenu informaciju o raspoloživosti sredstava rezerve koju daje Direkcija, izuzev u slučajevima propisanim članom 88 stavom 3 Zakona o budžetu.
- (4) Vlada odobrava prijedlog odluke iz stava 3 ovog člana, a gradonačelnik predlaže Skupštini usvajanje odluke o odobravanju korištenja sredstava rezerve.
- (5) U slučaju iz člana 88 stava 3 Zakona o budžetu, Direkcija, na osnovu zaključka Vlade, odnosno zahtjeva gradonačelnika, priprema prijedlog odluke o korištenju sredstava rezerve i upućuje je Vladi na donošenje.
- (6) Gradonačelnik je dužan izvještavati Skupštinu o stanju i korištenju sredstava rezerve u skladu s članom 88 stavom 3 Zakona o budžetu.

Član 26 **(Mjesečno izvještavanje o naplaćenim prihodima)**

- (1) Prvog radnog dana u mjesecu, Trezor je dužan budžetskom korisniku, elektronskim putem dostaviti analitički izvještaj o naplaćenim prihodima iz njegove nadležnosti u prethodnom mjesecu.
- (2) Do petog u mjesecu, budžetski korisnik je dužan izvršiti usaglašavanje ostvarenih prihoda s analitičkim izvještajem Trezora i dostaviti Trezoru izvještaj o ostvarenim prihodima za prethodni mjesec.
- (3) Podaci i izvještaji iz stava 2 ovog člana dostavljaju se elektronskim putem i putem pošte.

Član 27 **(Izvještavanje u postupku izvršenja budžeta)**

- (1) Direkcija je dužna najkasnije do 25-og dana u mjesecu, budžetskom korisniku dostaviti izvještaj o planu i ostvarenju prihoda i primitaka, rashoda i izdataka za prethodni period, a s ciljem usaglašavanja podataka o izvršenju budžeta budžetskog korisnika s podacima iz Glavne knjige.
- (2) Usaglašavanje izvršenja budžeta budžetskog korisnika s podacima iz Glavne knjige budžetski korisnici su dužni izvršiti do kraja tekućeg mjeseca za prethodni period.

Član 28 **(Finansiranje i sufinansiranje programa, odnosno projekata od javnog interesa)**

- (1) Utrošak sredstava budžetskog korisnika za finansiranje i sufinansiranje programa, odnosno projekata od javnog interesa vrši se u skladu s:
 - a) usvojenim budžetom za fiskalnu godinu,
 - b) pravilnikom o dodjeli sredstava iz budžeta udruženjima, fondacijama i drugim pravnim i fizičkim licima za finansiranje programa, odnosno projekata od javnog interesa,
 - c) Programom utroška sredstava iz člana 32 ovog zakona.
- (2) Pravo učešća na javnom pozivu iz člana 59 Zakona o budžetu nema udruženje i fondacija, odnosno drugo pravno ili fizičko lice koje nije ispunilo obaveze i opravdalo utrošak sredstava dodijeljenih u skladu s Poglavljem VI. Zakona o budžetu, za realizaciju programa, odnosno projekata od javnog interesa, od bilo kojeg budžetskog korisnika u Distriktu u prethodnih pet godina.
- (3) Rok do kojeg korisnici sredstava za finansiranje i sufinansiranje programa, odnosno projekata od javnog interesa moraju podnijeti završni izvještaj o namjenskom utrošku sredstava je 30 dana od dana okončanja programa, odnosno projekta od javnog interesa.

Član 29 **(Izvršenje tekućih donacija, subvencija i transfera)**

- (1) Budžetske rashode za tekuće donacije, subvencije i transfere iz nadležnosti budžetskog korisnika za fiskalnu godinu, budžetski korisnik izvršava u skladu sa zakonima Bosne i

Hercegovine, zakonima Distrikta, aktima organa na nivou Bosne i Hercegovine obvezujućih za Distrikt i odlukama Vlade i Skupštine.

- (2) Budžetski rashodi za finansiranje udruženja, fondacija i održavanje manifestacija, a koji su od posebnog interesa za Distrikt, izvršavaju se na osnovu odluke Vlade koja se donosi za svaku fiskalnu godinu na prijedlog nadležnog budžetskog korisnika.
- (3) Dodjela sredstava za finansiranje budžetskih rashoda iz stavova 1 i 2 ovog člana vrši se putem javnog poziva ili bez objave javnog poziva.
- (4) Izvršenje rashoda iz stavova 1 i 2 ovog člana vrši se na osnovu programa utroška sredstava koji usvaja Vlada na prijedlog nadležnog budžetskog korisnika.
- (5) Izvršenje rashoda iz stava 1 ovog člana koje realizuje Skupština na osnovu zakona, odnosno posebne odluke Skupštine, vrši se na osnovu programa utroška sredstava koji usvaja nadležno skupštinsko tijelo.

Član 30 **(Izvršenje kapitalnih donacija i transfera)**

- (1) Kapitalne donacije i transferi su donacije i transferi koji po svojoj prirodi predstavljaju kapitalne izdatke.
- (2) Budžetske rashode za kapitalne donacije i transfere iz nadležnosti budžetskog korisnika za fiskalnu godinu, budžetski korisnik izvršava u skladu sa zakonima Bosne i Hercegovine, zakonima Distrikta, aktima organa na nivou Bosne i Hercegovine obvezujućih za Distrikt i odlukama Vlade i Skupštine.
- (3) Sredstva za kapitalne donacije i transfere dodjeljuju se javnim preduzećima, javnim ustanovama, vanbudžetskim fondovima, vanbudžetskim korisnicima koji su obveznici primjene budžetskog računovodstva, udruženjima građana i fondacijama i drugim nivoima vlasti u Bosni i Hercegovini.
- (4) Sredstva za kapitalne donacije i transfere iz stava 3 dodjeljuju se za kapitalne donacije i transfere:
 - a) po osnovu zajedničkog finansiranja projekata;
 - b) po osnovu javno-privatnog partnerstva;
 - c) za ostale kapitalne donacije i transfere.
- (5) Izvršenje rashoda iz stava 2 ovog člana vrši se na osnovu programa utroška sredstava koji usvaja Vlada na prijedlog nadležnog budžetskog korisnika.
- (6) Izvršenje rashoda iz stava 2 ovog člana koje dodjeljuje Skupština na osnovu zakona, odnosno posebne odluke Skupštine, vrši se na osnovu programa utroška sredstava koji usvaja nadležno skupštinsko tijelo.

Član 31 **(Donacije za jednokratne pomoći i sponzorstva)**

(1) Gradonačelnik i predsjednik Skupštine mogu na osnovu posebnog akta izvršavati rashode za donacije za fiskalnu godinu za sljedeće namjene:

- a) jednokratne pomoći fizičkim licima;
- b) jednokratne pomoći udruženjima i fondacijama, sponzorstva, odnosno pokroviteljstva.

(2) Izvršenje rashoda iz stava 1 ovog člana vrši se na osnovu programa utroška sredstava koji usvaja Vlada, odnosno nadležno skupštinsko tijelo.

Član 32 **(Programi utroška sredstava)**

- (1) Budžetski korisnik je obavezan Vladi predložiti program utroška sredstava za donacije, subvencije i transfere kao i sredstava za finansiranje i sufinansiranje programa, odnosno projekata od javnog interesa.
- (2) Nadležno skupštinsko tijelo donosi program utroška sredstava za donacije, subvencije i transfere kao i sredstava za finansiranje i sufinansiranje programa, odnosno projekata od javnog interesa koje dodjeljuje Skupština kao budžetski korisnik.
- (3) Elementi programa utroška su:
 - a) naziv programa;
 - b) pravni osnov dodjele sredstava;
 - c) način dodjele sredstava;
 - d) svrha programa utroška;
 - e) kriteriji za raspodjelu sredstava;
 - f) visina sredstava;
 - g) namjena sredstava;
 - h) izvori sredstava;
 - i) naziv korisnika sredstava;
 - j) rok u kojem sredstva moraju biti utrošena;
 - k) način i kontrola utroška sredstava;
 - l) način i rok izvještavanja o utrošku primljenih sredstava,
 - m) postupanje s dodijeljenim sredstvima koja nisu utrošena u roku iz stavova 5 i 6 ovog člana.
- (4) Sredstva se ne mogu dodijeliti prije nego što Vlada, odnosno nadležno skupštinsko tijelo odobri program utroška sredstava iz stavova 1 i 2 ovog člana.
- (5) Budžetski korisnik je obavezan uspostaviti mehanizam kontrole dodjele i utroška sredstava iz budžeta za fiskalnu godinu koja su namijenjena za donacije, transfere i subvencije, kao i za finansiranje i sufinansiranje programa, odnosno projekata od javnog interesa, u smislu da budžetski korisnik ustroji posebne kriterije i evidenciju o dodjeli i načinu trošenja sredstava, kao i u smislu definisanja sadržaja izvještaja o namjenskom utrošku dodijeljenih sredstava.
- (6) Rok do kojeg korisnici sredstava moraju podnijeti izvještaj o namjenskom utrošku sredstava dodijeljenih za realizaciju projekta, odnosno programa je 30 dana od okončanja projekta, odnosno programa, neovisno o tome da li se radi o programu, odnosno projektu od javnog interesa.
- (7) Korisnik sredstava kojem se dodjeljuju sredstva koja se ne odnose na projekte, odnosno programe dužni su podnijeti izvještaj o namjenskom utrošku sredstava dodijeljenih u prethodnoj godini do dana podnošenja zahtjeva za nova sredstva, a najkasnije do 30. septembra tekuće godine za prethodnu godinu.
- (8) Budžetski korisnik neće dodijeliti sredstva korisniku sredstava ukoliko korisnik sredstava nije podnio izvještaj o namjenskom utrošku sredstava u skladu s programom utroška sredstava budžetskog korisnika na osnovu kojeg su sredstva dodijeljena i stavovima 6 i 7 ovog člana.
- (9) Odobreni program utroška sredstava objavljuje se u Službenom glasniku Brčko distrikta Bosne i Hercegovine.

- (10) Sadržaj elemenata programa utroška iz stava 3 tački j), k), l) i m) ovog člana zavisi od svrhe programa utroška sredstava, odnosno namjene sredstava.
- (11) Ukoliko programom utroška sredstava nisu predviđeni elementi iz stava 3 tački j), k), l) i m) ovog člana, ne primjenjuju se stavovi 6, 7 i 8 ovog člana.

POGLAVLJE II. NADZOR NAD IZVRŠENJEM BUDŽETA I PREKRŠAJNE ODREDBE

Član 33 (Nadzor nad izvršenjem budžeta)

Nadzor nad izvršenjem budžeta se vrši u skladu s članom 110 Zakona o budžetu.

Član 34 (Prekršajne odredbe)

- (1) Odgovorno lice budžetskog korisnika kaznit će se za prekršaj u skladu s odredbama člana 113 i člana 114 Zakona o budžetu.
- (2) Novčanom kaznom u iznosu od 300 KM do 1.500 KM kaznit će se za prekršaj odgovorno lice budžetskog korisnika u slučaju da:
- a) sredstva ne koristi za namjene koje su utvrđene budžetom i do iznosa odobrenog za tog budžetskog korisnika (član 5 stav 1 ovog zakona);
 - b) postupi suprotno članu 18 ovog zakona;
 - c) postupi suprotno članu 19 ovog zakona;
 - d) do petog u mjesecu ne izvrši usuglašavanje ostvarenih prihoda s analitičkim izvještajem Trezora i ne dostavi Trezoru izvještaj o ostvarenim prihodima za prethodni mjesec (član 26 stav 2 ovog zakona);
 - e) ne izvrši usaglašavanje izvršenja budžeta budžetskog korisnika s podacima iz Glavne knjige do kraja tekućeg mjeseca za prethodni period (član 27 stav 2 ovog zakona);
 - f) postupi suprotno članu 32 ovog zakona.

DIO TREĆI – ZAVRŠNE ODREDBE

Član 35 (Provođenje Zakona)

Zakon se provodi u skladu sa Zakonom o budžetu, Zakonom o javnim nabavkama Bosne i Hercegovine, Zakonom o zaduživanju, dugu i garancijama Bosne i Hercegovine, Zakonom o

unutrašnjem dugu Brčko distrikta Bosne i Hercegovine, Zakonom o Direkciji za finansije Brčko distrikta Bosne i Hercegovine, Zakonom o sistemu državne pomoći Bosne i Hercegovine i Zakonom o Trezoru Brčko distrikta Bosne i Hercegovine.

Član 36
(Stupanje na snagu)

Ovaj zakon stupa na snagu prvog narednog dana od dana objavljivanja u Službenom glasniku Brčko distrikta Bosne i Hercegovine, a primjenjivat će se za fiskalnu 2023. godinu.

Broj: 01-02-6156/22
Brčko, 21. 12. 2022. godine

PREDSJEDNIK
SKUPŠTINE BRČKO DISTRIKTA BiH
Mr. sci. Siniša Milić